

आकाशवाणी रायपुर (छत्तीसगढ़)
(छत्तीसगढ़ी)

18.10 रविवार

दिनांक 31.08.2025

प्रमुख समाचार –

1— आकाशवाणी ले आज, 'मन की बात' कारीकरम म प्रधानमंत्री ह किहीन कि देसवासी मन ल स्वदेसी ल धियान म रखना चाही।

2— छत्तीसगढ़ उच्च न्यायालय ह नीट-यूजी के काउंसिलिंग प्रक्रिया अउ आवंटन के खिलाफ दायर याचिका ल खारिज कर देहे।

अउ

3— आज ले सुरु होइस बिसेस रेडियो कारीकरम "दीदी के गोठ", ए कारीकरम आकाशवाणी रायपुर समेत प्रदेश के सबो आकाशवाणी केंद्र ले एके संघरा प्रसारित करे गीस।

.....

मन की बात-01

प्रधानमंत्री नरेंद्र मोदी ह किहीन हे कि देस ल इंहा के बने चीज ल बढ़ावा दे खातिर वोकल फॉर लोकल, आत्मनिर्भर भारत अउ विकसित भारत के मंत्र के संग आगू बढ़ना होही। आकाशवाणी ले आज 'मन की बात' कारीकरम म प्रधानमंत्री ह किहीन कि देसवासी मन ल स्वदेसी ल धियान म रखना चाही।

ओमन ह किहीन कि तिहार के खुसी के बीच स्वच्छता उपर जोर देवत रहना चाही, काबर कि जिंहा स्वच्छता हे उंहा तिहार के खुसी ह अउ जादा बाढ़ जाथे। ओमन ह किहीन कि 'एक भारत-श्रेष्ठ भारत' के भावना ह देस के विकास बर बढ़ जरूरी हे अउ एमा खेल के बढ़का

भूमिका घलो हे। संगेसंग श्रीनगर म आयोजित प्रथम खेलो इंडिया जलक्रीड़ा उत्सव के घलो गोठ करीन।

प्रधानमंत्री ह किहीन कि मानसून के चलत आय प्राकृतिक आपदा ह पाछू कुछ हफ्ता ले देस म बाढ़ अउ भूस्खलन के रूप म बड़का बिपत्ति लेके आय हे। परेसानी के ए बेरा म स्थानीय लोगन सामाजिक कार्यकर्ता, चिकित्सा अउ प्रशासन ह भरपूर मदद करे हे।

मन की बात-02

प्रधानमंत्री ह डिजिटल ऐप प्रतिभा सेतु के घलो गोठ करीन। ए ऐप म ओ उम्मीदवार मनके जानकारी राखे गेहे, जउन मन ह यूपीएससी के आने-आने परीक्षा के सबो चरण ल पास कर लीन हे, फेर आखिरी मैरिट सूची म उंखर नाव ह नइ आय पाइस। ए पोर्टल ले प्राइवेट कंपनी ह ए होनहार छात्र मनके जानकारी लेके ओमन ल अपन इंहा नियुक्ति दे सकत हे।

श्री मोदी ह किहीन कि सौर ऊर्जा किसान मनके जीवन म बड़का बदलाव लावत हे। रामायण अउ भारतीय संस्कृति के प्रति प्रेम ह अब दुनिया भर के हरेक कोना म बाढ़त जात हे। ओमन ह इटली म महर्षि वाल्मीकि अउ कनाडा म भगवान श्रीराम के प्रतिमा के अनावरण के उल्लेख करीन।

प्रधानमंत्री ह बतइन कि पंद्रह सितंबर के भारत के महान इंजीनियर मोक्षगुंडम विश्वेश्वरैया के जनमदिन हरय, जेला इंजीनियर दिवस के रूप म मनाय जाथे। ओमन ह किहीन कि सत्रह सितंबर के विश्वकर्मा जयंती हे। श्री मोदी ह बतइन कि ए दिन ह ओ विश्वकर्मा बंधू मन ल समर्पित हरय जउन मन परंपरागत सिल्प, कौशल अउ ज्ञान-विज्ञान ल सरलग एक पीढ़ी ले दूसर पीढ़ी तक पहुंचावत हे।

मन की बात—छत्तीसगढ़

प्रधानमंत्री नरेंद्र मोदी के रेडियो कारीकरम 'मन की बात' ल छत्तीसगढ़ म घलो सुने गिस। मुख्यमंत्री विष्णुदेव साय ह नवा रायपुर के डॉक्टर श्यामा प्रसाद उद्योग अउ व्यापार परिसर म आयोजित कारीकरम म सामिल होइन। ए मउका म मंत्री, विधायक, जनप्रतिनिधि अउ आम लोगन मन ह घलो बड़का संख्या म मौजूद रिहीन।

ए बेरा म मुख्यमंत्री ह किहीन कि 'मन की बात' हर महिना प्रदेश के लोगन मन ल नवा ऊर्जा अउ प्रेरणा देथे। ओमन ह किहीन कि प्रधानमंत्री के ए रेडियो कारीकरम ह समाज के सबो वर्ग म सकारात्मक सोच अउ राष्ट्रीय चेतना ल प्रबल करथे। छत्तीसगढ़ के रजत जयंती बछर के बारे म बोलत हुए मुख्यमंत्री ह किहीन कि विकसित छत्तीसगढ़ के निर्माण तभे संभव हे, जब हरेक लोगन मन ह अपन भूमिका ल ईमानदारी ले निभावय।

हाईकोर्ट—नीट/यूजी

छत्तीसगढ़ उच्च न्यायालय ह नीट/यूजी के काउंसिलिंग प्रक्रिया अउ आवंटन के खिलाफ दायर याचिका ल खारिज कर देहे। छत्तीसगढ़ चिकित्सा शिक्षा निदेशालय—सीजीडीएमई कोति ले जारी करे गे प्रावीण्य सूची ल वैध मानत हुए हाईकोर्ट ह ओखर आधार म करे गे सीट आवंटन के प्रक्रिया ल सही माने हे। एखर बाद चिकित्सा काउंसिलिंग समिति ले काउंसिलिंग के नवा तिथि के दिसा निरदेस मिले म दूसर चरण अउ अवइया चरण के नवा समय सारिणी ल डीएमई कोति ले जारी करे जाही। नवा समय—सारिणी के जानकारी ह अभ्यर्थी मन ल सीजीडीएमई के वेबसाइट म मिल जही।

जानबा के अनुसार नीट/यूजी के काउंसिलिंग के बेरा एक झन अभ्यर्थी ह पहिली चरण के काउंसिलिंग म सीजीडीएमई कोति ले देगे श्रेणी अउ संपर्क म बदले के विकल्प ल चुनौती देवत हुए हाईकोर्ट म याचिका लगाय रिहीन। संगेसंग एखरे आधार म बारह अगस्त के जारी करे गे प्रावीण्य सूची ल घलो मान्य नइ करे के मांग करे गे रिहीस।

जीडीपी-वृद्धि अनुमान

भारत के वास्तविक सकल घरेलू उत्पाद— जीडीपी वर्तमान वित्त बछर के अप्रैल-जून तिमाही म सात दसमलव आठ प्रतिसत के दर ले बाढ़े के अनुमान हे। एहा पांच तिमाही म सबले जादा हे। पाछू वित्त बछर के चौथा तिमाही म जीडीपी ह सात दसमलव चार प्रतिसत रिहीस। जबकि पाछू वित्त बछर के पहिली तिमाही म एहा छै दसमलव पांच प्रतिसत रिहीस। सांख्यिकी अउ कारीकरम कार्यान्वयन मंत्रालय कोति ले जारी करे गे, पहिली तिमाही के आंकड़ा के अनुसार नामिनल जीडीपी म आठ दसमलव आठ प्रतिसत के वृद्धि होइस हे।

ऐति, छत्तीसगढ़ लघु उद्योग भारती सर्विसेस इकाई के बैंकिंग विभाग के उद्योगपति दुर्गा प्रसाद ह किहीन हे कि छोटे इकाई म सरकार ह जादा धियान देवत हे। एखरे सेति ए वृद्धि देखे बर मिलत हे।

दीदी के गोठ

राज्य ग्रामीण आजीविका मिशन-बिहान के चलत तियार करे गे एक ठिक बिसेस रेडियो कारीकरम “दीदी के गोठ” आज आकाशवाणी रायपुर समेत सबो आकाशवाणी केंद्र ले एके संघरा प्रसारित करे गीस।

ए बेरा म ग्रामीण माईलोगिन मन के नाव म मुख्यमंत्री विष्णुदेव साय, केंद्रीय ग्रामीण विकास मंत्री शिवराज सिंह चौहान अउ राज्य के उपमुख्यमंत्री अउ पंचायत तथा ग्रामीण विकास मंत्री विजय शर्मा के संदेस ल प्रसारित करे गीस। संगेसंग “बिहान” योजना के कतकोन दीदी— नारायणपुर जिला के कच्चापाल ग्राम पंचायत के आश्रित ग्राम इरकभट्टी के लखपति दीदी संताय पोटाई अउ बस्तर जिला के दरभा के लखपति दीदी बनकला कश्यप के सफलता के कहानी ल घलो सुनाय गीस।

“दीदी के गोठ” रेडियो कारीकरम ल सुने बर प्रदेश के सबो जिला पंचायत म बिसेस बेवस्था करे गे रिहीस। दीदी के गोठ रेडियो कारीकरम के प्रसारण हर महिना के आखिरी ईतवार के मंझनिया बारह बजके पंद्रह मिनट म आकाशवाणी केंद्र ले करे जाही।

साइबर जागरूकता कार्यक्रम

साइबर अपराध ल रोके अउ लोगन मन ल जागरूक करे के उद्देश्य ले सक्ति पुलिस अउ एसबीआई बैंक कोति ले साइबर जागरूकता कारीकरम के आयोजन करे गीस। ए बेरा म नुक्कड़ नाटक करके लोगन मन ल साइबर ठगी के बारे म बताय गीस। उहें, साइबर सर्तकता रथ ल घलो हरा झंडी दिखाके रवाना करे गीस। ए रथ ह जघा—जघा घूमके लोगन मन ल साइबर अपराध ले बांचे के उपाय ल बताही।

फुटबॉल प्रतियोगिता

ऑल इंडिया फुटबॉल फेडरेशन अउ रामकृष्ण मिशन आश्रम कोति ले नारायणपुर म सब जूनियर महिला राष्ट्रीय फुटबॉल प्रतियोगिता के आयोजन करे जात हे।

ए प्रतियोगिता के चलत खेले गे दूसर सेमीफाइनल मुकाबला म केरल के टीम ह राजस्थान ल दू के मुकाबला म आठ गोल ले हराके फाइनल म प्रवेश करे हे। ए प्रतियोगिता के फाइनल मुकाबला तीन सितंबर के केरल अउ उत्तर प्रदेश के बीच खेले जाही। ए प्रतियोगिता म देसभर के चौदह ठिन टीम ह भाग लीन।

चक्रधर समारोह

रायगढ़ म चलत चक्रधर समारोह के चौथा दिन ओडिशी, कथक, पंथी नृत्य, सितार वादन अउ कव्वाली के प्रस्तुति ह लोगन मन के मन ल मोह डरिन। त उहें, दिल्ली ले आय अनीस साबरी के कव्वाली ह दर्सक मन ल झूमे बर मजबूर कर दीन।

ऐति, सुप्रसिद्ध पंथी नर्तक पद्मश्री राधेश्याम बारले के टीम ह संत बाबा गुरुघासी दास के संदेश उपर जीवंत प्रस्तुति दीन। ए कारीकरम म इशिका गिरि ह ठुमरी, श्वेता वर्मा ह कथक, प्रोफेसर डॉक्टर लवली शर्मा ह सितार वादन अउ खैरागढ़ संगीत विश्वविद्यालय के छात्र मन ह लोकनृत्य ल प्रस्तुत करीन।
